

四庫全書

集部

欽定四庫全書

集部

御選歷代詩餘卷四十九

詳校官中書<sub>臣</sub>潘有為

侍讀<sub>臣</sub>孫球覆勘

總校官進士<sub>臣</sub>朱鈴

校對官主事<sub>臣</sub>陳文樞

謄錄監生<sub>臣</sub>方汝觀

欽定四庫全書

御選歷代詩餘卷四十九目錄

起七十六字至七十八字

風入松 又一體

利登

虞集

張翥 二首

吳子孝

文徵明 五首

陸深

沈麐

祝英臺近

又一體

蘇軾

呂渭老

趙長卿

辛棄疾

程垓

趙彥端

岳珂

劉過  
二首

張輯  
二首

黃機

高觀國  
二首

史達祖  
三首

韓淲  
二首

張渠

吳文英

四首

蔣捷

周密

二首

張炎

六首

湯恢

二首

李彭老

無名氏

三首

吳淑姬

邵亨貞

側犯

周邦彥

袁去華

姜夔

方千里

楊澤民

陳允平

四園竹

周邦彥

方千里

楊澤民

御街行

又一體

張先

劉基



撲蝴蝶近 又一體

呂渭老

無名氏

快活年近拍

万俟雅言

一叢花

歐陽修

蘇軾

秦觀

晁補之 二首

趙長卿 二首

程垓

袁去華

陸游

韓淲

吳子孝

鳳樓春

歐陽炯

陽關引

寇準

晁補之

金人捧露盤

辛棄疾

二首

甘州令

柳永

紅牕燈影

王錫爵

御街行

又一體

范仲淹

楊无咎

辛棄疾

程垓

李清照

御選歷代詩餘卷四十九目錄

欽定四庫全書

御選歷代詩餘卷四十九

起七十六字至七十八字

司營洗馬掌局事兼翰林院修撰加二級臣王奕清奉

旨校刊

風入松

又一體雙調七十六字

風入松

利登

斷蕪幽樹際煙平山外更山青天南海北知何極年年

是匹馬孤征看盡好花結子暗驚新笋成林 歲華情  
事苦相尋弱雪鬢毛侵十千斗酒悠悠醉斜河界白月  
雲心孤鶴盡邊天濶清猿啼處山深

前調

虞集

畫堂紅袖倚清酣華髮不勝簪幾回晚直金鑾殿東風  
軟花裏停驂書詔許傳宮燭輕羅初試朝衫 御溝冰  
泮水按藍飛燕語呢喃重重簾幙寒猶在憑誰寄銀字  
泥緘報道先生歸也杏花春雨江南



前調

張翥

東風巷陌暮寒驕。燈火闌河橋。勝遊偏憶錢塘夜，青鸞遠，信斷難招。蕙草情隨雪盡，梨花夢與雲銷。客懷先自痛無聊。綠酒負金蕉。下幃獨擁香篝睡，春城外，玉漏聲遙。可惜滿街明月，更無人為吹簫。

前調

清明日海  
子上即事

張翥

尋春春在鳳城東。羅幙玉花驄。美人半鞦韆垂鞭袖，遊塵遠目斷雲空。淺碧湖波，漲淡黃官柳，煙蒙相如多。

病賦難工宿酒更頻中歸来自按新聲譜憑誰解唱與  
東風一夜小牕疎雨杏花明日應紅

前調

春日直省次  
虞伯生韻

吳子孝

漏聲驚夢不成酣和月整朝簪萬年枝上流鶯囀青霄  
近笙度鸞驂仙掌香承曉露宮花紅映春衫 龍池柳  
色碧於藍金屋燕呢喃綺牕無事東風靜芭蕉綠有恨  
誰緘翻憶少年今日銀鞍芳草城南

前調

賞蓮

文徵明

虛堂殘暑已無多，急雨戰秋荷。  
雨晴瞥見芙蓉秀，新妝靚錦韞。  
凌波出水天然婀娜，含風更自婆娑。  
花前有客，鼓雲和倚笛，更長歌。  
酒醒忽動江湖興，陶然處如在煙蘿。  
一片瀟湘晚景，相看玉女銀河。

前調

秋葵

文徵明

秋來幽豔試宮妝，蚤染薄羅裳。  
翠翹斜映鵝兒淡，比鵝兒却自芬芳。  
舊恨檀心暈紫，新嬌粉額塗黃。  
湘袍新翦，菊英長露浥，冷天香。  
晚涼自是無聊賴，低垂首默默。

傾陽剛被西風斂却含情自倚東牆

前調

夏夜  
露坐

文徵明

空庭人散語音稀獨坐漏遲遲風撩團扇無聊賴桐陰  
亂露下沾衣斗轉銀河東瀉月斜烏鵲南飛無端心  
事集雙眉睡思轉迷離牆西突兀高樓靜流螢度疑是  
星移何處一聲長笛等閒喚起相思

前調

簡湯  
子重

文徵明

西齋睡起雨濛濛雙燕語簾櫳平生行樂都成夢難忘

處碧鳳坊中酒散風生棋局詩成月在梧桐 近來多  
病不相逢高興若為同清尊白苧交新夏應孤負綠樹  
陰濃憑仗柴門莫掩興來擬扣牆東

前調

寄友

文徵明

日長無事掩精廬繞屋樹扶疎南牕雨過湘簾捲煙霏  
帳冰簟平鋪午困全消茗椀宿醒自倒冰壺 虛堂風  
定一塵無香裊博山鑪何時去覓山公笑花間醉樹底  
樽蒲見說香生丹桂莫教秋近庭梧

前調

送友次虞伯生韻

陸深

離筵高興付餘酣暫得解朝簪  
路出齊封三宿晝何須  
便快著征驂兩岸山橫畫障一川水膩羅衫  
終朝不采滿筐藍  
話別語喃喃一把相思無處著  
欲憑寄雁足  
雙緘自是煙霄有待怕飛不到江南

前調

秋夜籟閣聽雨感懷

沈麋

紫崖奔處斷雲行竹篠戰風鳴  
北郊黃葉埋荒徑苔痕  
滑鶴唳淒清細聽虛飄天籟詩腸瀟灑羣生  
踈踈滴

滴數殘更做弄許多聲倦依孤枕愁常掩燈花約濕夢  
分明此夜寒江淚落醉邊心事傷情

祝英臺近

又一體雙調  
七十七字

祝英臺近

蘇軾

挂輕帆飛急槳還過釣臺路酒病無聊敲枕聽鳴櫓斷  
腸簇簇雲山重重煙樹回首望孤城何處間離阻誰  
念縈損襄王何曾夢雲雨舊恨前歡心事兩無據要知

欲見無由癡心猶自倩人道一聲傳語

前調

呂渭老

寶蟾明朱閣靜新燕近簾語還記元宵燈火小橋路逢  
迎春筍柔微凌波纖穩悄不顧斗斜三鼓甚無據誰  
信一霎春愁鶯聲留住不住柳色苔痕風雨暗花圓細看  
羅帶銀鈎綃巾香淚算不枉那時分付

前調

趙長卿

記臨岐銷黯處離恨慘歌舞恰是江梅開徧小春暮斷



腸一曲金衣兩行玉筍酒闌後欲行難去  
惡情緒因念錦幄香匳別來負情素冷落深閨知解怨人否料應  
寶瑟慵彈露華嬾傳對鸞鏡終朝凝竚

前調

辛棄疾

寶釵分桃葉渡煙柳暗南浦怕上層樓十日九風雨斷  
腸點點飛紅都無人管更誰勸流鶯聲住鬢邊覩試  
把花卜歸期才簪又重數羅帳燈昏哽咽夢中語是他  
春帶愁來春歸何處却不解帶將愁去

前調

程垓

墜紅輕濃綠潤深院又春晚睡起厭厭無語小妝嬾可  
堪三月風光五更魂夢又都被杜鵑催儻怎消遣人  
道愁與春歸春歸愁未斷閒倚銀屏羞怕淚痕滿斷腸  
沉水重熏瑤琴閒理奈依舊夜寒人遠

前調

趙彥端

獸金寒簾玉潤梅雪印苔絮春意如人易散苦難聚幾  
多絲竹深情池塘幽夢猶倚賴與春同住舊游處誰

喚別浦仙帆風前問征路煙雨連江吹恨正無數莫教  
紫燕歸來彩雲開後空悵望主人輕去

前調

北固亭

岳珂

淡煙橫層霧斂勝槩分雄占月下鳴榔風急怒濤颭關  
河無限清愁不堪臨鑑正雙鬢秋風塵染謾登覽極  
目萬里沙場事業頻看劍古往今來南北限天塹倚樓  
休弄新聲重城門掩歷歷數西州更點

前調

同妓遊帥司東園

劉過

窄輕衫聯寶轡花裏控金勒有底風光都在畫闌側日  
遲春暖融融杏紅深處為花醉一鞭春色對嬌質為  
我歌捧瑤觴歡聲動阡陌何似多情飛上鬢雲碧晚來  
約住青驄踏花歸去亂紅碎一庭風月

前調

劉過

笑天涯還倦客欲起病無力風雨春歸一日近一日看  
人結束春衫前呵騎馬腰劍上隴西平策鬢粉白只  
可歸去家山無田種瓜得空抱遺書顚顚小樓側杜鵑

不管人愁月明枝上直啼到枕邊相覓

前調

張輯

竹間茶池上字風日共清美誰道春深湘綠漲沙嘴更  
添楊柳無情恨煙顰雨却不把扁舟偷繫去千里明  
日知幾重山後期幾重水對酒相思爭似且留醉奈何  
琴劍匆匆而今心事在月夜杜鵑聲裏

前調

朱使君錢塘舟中

張輯

客西湖聽夜雨更向別離處小小船牕香雪照尊俎斷

腸一曲秋風行雲不語總寫入征鴻無數認眉嫵喚  
醒岩壑風流丹砂有奇趣羞殺秦郎淮海謾千古要看  
自作新詞雙鸞飛舞趁月底重修簫譜

前調

黃機

試單衣扶短策沙路淨如洗乍雨還晴花柳自多麗爭  
知話別南樓片帆天際便孤了同心連理鎮縈繫謾  
有羅帶香囊殷紅鬪輕翠一紙濃愁無處倩雙鯉可堪  
飛夢悠悠春風無賴時吹過亂鶯聲裏

前調 荷花

高觀國

擁紅妝翻翠蓋花影暗南浦波面激霞蘭艇採香去有  
人水濺紅裙相招晚醉正月上涼生風露兩凝竚別  
後歌斷雲閒嬌姿黯無語魂夢西風端的此心苦遙想  
芳臉輕顰凌波微步鎮輸與沙邊鷗鷺

前調

高觀國

一牕閒孤燼冷獨自箇春睡繡被熏香不似舊風味靜  
聽滴滴檐聲驚愁攪夢更不管庾郎心碎念芳意一

併十日春寒梅花煞憔悴嬾做新詞春在可憐裏幾時  
挑菜踏青雲沉雨斷盡分付楚天之外

前調

史達祖

柳枝愁桃葉恨前事怕重記紅藥開時新夢又溱洧此  
情老去須休春風多事便老去越難迴避阻幽會應  
念偷翦酴醾柔條暗紫繫節物移人春草更憔悴可堪  
竹院題詩鮮堦聽雨寸心外安愁無地

前調

薔薇

史達祖



綰流蘇垂錦綬煙外紅塵逗莫倚莓牆花氣釀如酒便  
愁醺醉青蚪蠕蠕無力戲穿碎一屏新繡漫懷舊如  
今姚魏俱無風標較消瘦露點瑤香前度翦花手見郎  
和笑拖裙匆匆欲去驀忽地留芳袖

前調

史達祖

落花深芳草暗春到斷腸處金勒驕風欲過大隄去翠  
樓葛嶺西邊恰如曾約畫闌映一枝瓊樹正凝竚芳  
意欺月矜春渾欲便偷許多少鶯聲不敢寄愁與謝郎

日日西湖如今歸後幾時見倚簾吹絮

前調

韓流

海棠開春已半桃李又如許一朶梨花院落闌干雨不  
禁中酒情懷愛閒懊惱都忘却舊題詩處燕鶯語溪  
岸點點飛絲楊柳無重數帶得愁來只恁空休去斷腸  
芳草天涯行雲荏苒和好夢有誰分付

前調

寒食

韓流

館娃宮采香徑范蠡五湖側子夜吳歌聲緩不須拍崇

桃積李花間芳洲綠徧更冉冉柳絲無力 試思憶老  
去一片身心辜負好春色古往今來時序惱行客去年  
今日山中如何知得却又在他鄉寒食

前調

賦壯丹

張 槩

柳絲稀桃錦淡春事在何許一種穠華天香漬冰露嫩  
苞疊疊湘羅紅嬌紫妒翠葆護西真仙侶 試聽取更  
饒十日看承霞腴汗塵土池館輕寒次第少風雨好趁  
油幕清閒重開芳醕莫孤負鶯歌蝶舞

前調 上元

吳文英

晚雲開朝雪霽時節又燈市夜約遺香南陌少年事笙  
簫一片紅雲飛來海上繡簾卷綳桃春起 舊游地素  
娥城闕年年新妝趁羅綺玉練冰輪無塵浣流水曉霞  
紅處啼鴉良宵一夢畫堂正日長人睡

前調

除夜  
立春

吳文英

翦紅情裁綠意花信上釵股殘日東風不放歲華去有  
人添燭西牕不眠侵曉笑聲轉新年鶯語 舊尊俎玉

纖曾擘黃柑柔香繫幽素歸夢湖邊還迷鏡中語可憐  
千點吳霜寒銷不盡又相對落梅如雨

前調

錢陳少逸  
被檄行部

吳文英

問流花尋夢草雲暖翠微路錦雁峰前淺約晝行處不  
教嘶馬飛春一匳越鏡那銷盡紅吟綠賦 送人去長  
絲初染柔黃晴和曉煙舞心事偷占鶯漏漢宮語趁得  
羅蓋天香歸來時候共留取玉闌春住

前調

春日遊龜  
溪廢圃

吳文英

採幽香尋古苑竹冷翠微路鬪草溪根沙印小蓮步自  
憐兩鬢清霜一年寒食又身在雲山深處盡閒度因  
甚天也慳春輕陰便成雨綠暗長亭歸夢趁風絮有情  
花影闌干鶯聲門徑解留我霎時凝竚

前調

蔣捷

柳邊樓花下館低捲繡簾半簾外天絲擾擾似情亂知  
他蛾綠纖眉鵝黃小袖在何處閒游閒玩最堪歎第  
面一寸塵深玉柱網斜雁譜字紅鸞翦燭記同看幾回

傳語東風將愁吹去怎奈向東風不管

前調

攬秀園

周密

步玲瓏尋窈窕瑤草四時碧小小蓬萊花氣透簾隙幾  
回翠水荷初蒼厓梅小綺寮掩玉壺春色柳屏窄芳  
檻日日東風幾陣吹吟筆曲折花房鶯燕似曾識最憐  
燈影纔收歌塵初靜畫樓外一聲橫笛

前調

後溪

周密

殢餘醒尋舊雨愁與病相半綠意陰陰絲竹靜深院絕

憐事逐春移淚隨花落似翦斷鮫房珠串  
書重見為誰倦酒慵詩篋屏掩雙扇白髮潘郎羞見看花伴可堪  
好夢殘時新愁生處煙月冷子規聲斷

前調

與友  
話舊

張炎

水痕深花信足寂寞漢南樹轉首清陰芳事頓如許不  
知多少銷魂夜來風雨猶夢到斷紅流處最無據長  
年息影空山愁入庾郎句玉老田荒心事已遲暮幾回  
聽得啼鵲不如歸去終不似舊時鸚鵡



前調

耕雲

張炎

占寬閒鉏浩渺船樣水村悄非霧非煙生氣覆瑤草蒙  
茸數畝春陰夢魂落寞知踏碎梨花多少聽孤嘯山  
淺種玉人歸縹緲度晴峭鶴下芝田五色散微照笑他  
隔浦誰家半江疎雨空吟斷一犁清曉

前調

重過西湖  
書所見

張炎

水西船山北酒多為買春去事與雲消飛過舊時雨漫  
留一掬相思待題紅葉奈紅葉更無題處正延佇亂

花渾不知名嬌小未成語短櫂輕裝逢迎斷橋路那知  
楊柳風流樹猶如此更休道少年張緒

前調

張炎

及春遊卜夜飲人醉萬花醒轉眼年華白髮半垂領與  
鷗同一清波風蘋月樹又何似浮蹤不定 靜中省便  
須門掩柴桑黃卷作孤隱一粟生涯樂事在瓢飲愛閒  
休說山深有梅花處更添個暗香疎影

前調

寄陳直卿

張炎

路重尋門半掩苔老舊時樹采藥雲深童子更無語怪  
我流水迢迢湖天日暮想只在蘆花多處漫延竚姓  
名題上芭蕉涼夜未風雨賦了秋聲還賦斷腸句幾回  
獨立長橋扁舟欲喚待招取白鷗歸去

前調

題陸壺天  
水墨蘭石

張炎

帶飄飄衣楚楚空谷飲甘露一轉花風蕭艾遽如許細  
看息影雲根淡然詩思曾否被生香輕誤此中趣能  
消幾筆幽竒羞掩衆芳譜薜老苔荒山鬼竟無語夢遊

忘了江南故人何處聽一片瀟湘夜雨

前調

湯恢

宿醒蘇春夢醒沉水冷金鴨落盡桃花無人埽紅雪漸  
催煮酒園林單衣庭院春又到斷腸時節恨離別長  
憶人立荼蘼珠簾卷幽月幾度黃昏瓊枝為誰折都將  
千里芳心十年幽夢分付與一聲啼鴂

前調

湯恢

月如冰天似水冷浸畫闌濕桂樹風前濃香半狼籍此

翁對此良宵別無可恨恨只恨故人頭白  
洞庭窄誰道臨水樓臺清光最先得萬里乾坤元無片雲隔不妨  
彩筆雲牋翠尊冰醞自管領一庭秋色

前調

後溪次周  
草窗韻

李彭老

杏花初梅花過時節又春半簾影飛梭輕陰小庭院舊  
時月底秋千吟香醉玉曾細聽歌珠一串忍重見描  
金小字題情生綃合歡扇老了劉郎天遠玉簫伴幾番  
鶯外斜陽闌干倚徧恨楊花遮愁不斷

前調

無名氏

倚危闌斜日暮  
驀驀甚情緒  
穉柳嬌黃全未禁風雨  
春江萬里雲濤扁舟飛渡  
那更聽塞鴻無數  
歎離阻有恨流落天涯  
誰念泣孤旅滿目風塵  
冉冉如飛霧是何人惹愁來  
那人何處怎知道愁來不去

前調

憶別

無名氏

海棠開花影下  
憶得舊遊戲  
恰似駢鸞同在彩雲裏  
夢回雨散雲收  
匆匆歸去一枕乍驚殘春睡  
甚情味人

去花也飄零餘香半憔悴點點飛紅都是去時淚可堪  
冷落黃昏瀟瀟微雨斷魂處朱闌獨倚

前調

無名氏

翦酴醿移芍藥深院教鸚鵡消遣宿醒敲枕熏沉炷自  
從載酒西湖探梅南浦久不見雪兒歌舞恨無據因  
甚不展眉頭凝愁過百五雙燕無情難寄斷腸句可憐  
淚濕青綃怨題紅葉落花亂一簾風雨

前調

宋媛

吳淑姬

粉痕消芳信斷好夢總無據病酒無聊歌枕聽殘雨斷  
腸曲曲屏山溫溫沉水都是舊看承人處久離阻應  
念一點芳心閒愁知幾許偷照菱花清瘦自羞覩可堪  
梅子酸時楊花飛絮亂鶯又催將春去

前調

邵亨貞

普天雲深夜雨幽興到何許風拍踈簾燈影逗牕戶自  
從暝宿河橋露聽江笛久不記舊游湘楚正無緒可  
奈滿目青山蕭蕭五陵樹斜掩屏山腸斷庾郎賦幾回



思繞蘋花夢尋蘭棹怕驚起故溪鷗鷺

側犯

雙調七十七字犯字是按歌時假借別調作腔詞  
原入歌譜故宣政詞家有側犯尾犯花犯玲瓏四  
犯等  
名也

側犯

周邦彥

暮霞霽雨小蓮出水紅妝靚風定看步韞江妃照明鏡  
飛螢度暗草秉燭遊花徑人靜攜豔質追涼就槐影  
金環皓腕雪藕清泉瑩誰念省滿身香猶是舊荀令見

說吳姬酒壚深迴煙鎖漠漠藻池苔井

前調

袁去華

篆銷餘馥燭堆殘蠟房櫳曉寒峭看杏臉羞紅尚嬌小  
游蜂靜院落綠水搖池沼閒遶翠樹底揶揄聽啼鳥  
愁風怕雨彈指春光了音信杳最堪恨歸雁過多少困  
倚孤眠晝長人悄睡起依然半牕殘照

前調

詠芍藥

姜夔

恨春易去甚春却向揚州住微雨正繭栗梢頭弄詩句

紅橋二十四總是行雲處無語漸半脫宮衣笑相顧  
金壺細葉千朶圍歌舞誰念我鬢成絲來此共尊俎後  
日西園綠陰無數寂寞劉郎自修花譜

前調

次周美成韻

方千里

四山翠合一溪碧繞秋容靚波定見鷺立魚跳動平鏡  
修竹散步屨古木通幽徑風靜煙霧直池塘倒晴影  
流年舊事老矣塵心瑩還暗省點吳霜顚顚愧潘令夢  
憶江南小園路迴愁聽葉落轆轤金井

前調

次周美  
成韻

楊澤民

九衢豔質看來怎比他閒靚清韻似照水橫斜暮臨鏡  
林間鎖畫閣花底藏芳徑幽靜將絳燭高燒照雙影  
瓊瑤皓素未及肌膚瑩伊試省我從今還肯再孤令記  
取蘭房夜深人迴牕外月照一方天井

前調

次周美  
成韻

陳允平

晚涼倦浴素妝薄試鉛華靚凝定似一朵芙蓉泛清鏡  
輕紈笑自撚撲蝶鴛鴦徑閒靜金鳳簪斜敲翠蟬影

冰肌玉骨襯體紅綃瑩還暗省記青青雙鬢舊潘令夢  
想鸞箏後堂深迴何日西風碧梧金井

四園竹

四或作西本曲名  
也雙調七十七字

四園竹

周邦彥

浮雲護月未放滿朱扉鼠搖暗壁螢度破牕偷入書幃  
秋意濃閒竚立庭柯影裏好風襟袖先知夜何其江  
南路繞重山心知漫與前期奈向燈前墮淚腸斷蕭娘

舊日書辭猶在紙雁信絕清宵夢又稀

前調

次周美成韻

方千里

花驄縱策制淚掩斜扉玉鑪細裊鴛被半閒蕭瑟羅幃  
銀漏聲那更雜踈踈雨裏此時懷抱誰知恨淒其西  
牕自翦寒花沉吟暗數歸期最愛深情密意無限當年  
往復書辭千萬紙甚近日人來字漸稀

前調

次周美成韻

楊澤民

殘霞殿雨皞氣入牕扉井梧墮葉寒砌叫蛩秋滿屏幃

羅袖匆匆敘別淒涼客裏異鄉誰更相知 念伊其當  
時芍藥同心誰知又爽佳期直到金風到後秋葉紅時  
細寫情辭何用紙又却恐秋涼葉漸稀

御街行

又一體雙調  
七十七字

御街行

張先

天非花豔輕非霧來夜半天明去來如春夢不多時去  
似朝雲何處遠雞栖燕落星沉月魉魉城頭鼓 參差

漸辨西池樹珠閣斜開戶綠苔深徑少人行苔上屐痕  
無數餘香遺粉剩衾閒枕天把多情付

前調

劉基

梧桐滴露鳴金井夜耿耿如年永月明棲鳥數移柯有  
似佳期不定華年迅速碧霄迢遞別恨空心領青鸞  
怕見單棲影任掩盤龍鏡盈盈一水隔雙星腸斷羽迷  
鱗暝消愁憑酒祗應無奈酒與愁同醒

撲蝴蝶近



又一體雙調

七十七字

撲蝴蝶近

呂渭老

分釵綰髻洞府難分手離觴短闕啼痕冰舞袖馬嘶霜  
滑橋迴路轉人依古柳曉色漸分星斗怎分割心兒  
一似傾入離愁萬千斗垂鞭佇立傷心還病酒十年夢  
裏嬋娟二月花中豆寇春風為誰依舊

前調

無名氏

煙條雨葉綠徧江南岸思歸倦客尋芳來較晚岫遙紅

日初斜陌上花飛正滿淒涼數聲羌管  
怨春短玉人應  
在明月樓中畫眉嬾  
蠻箋錦字多時魚鴈斷恨隨去  
水東流事與行雲共遠羅衾舊香猶暖

快活年近拍

雙調七  
十七字

快活年近拍

万俟雅言

千秋萬歲君五帝三王世觀風重令節與民樂盛際蕊  
宮長春洞天不老花豔蟾輝十里照春珠翠  
鬧羅綺

遙望太極一簇通明裏  
釣臺奏壽蓬山呈妙戲  
六宮人來五雲樓  
迥風送歌聲依約  
睿思新製

一叢花

雙調七

十八字

一叢花

歐陽修

傷春懷遠幾時窮  
無物似情濃  
離愁正恁牽絲亂  
更南陌飛絮濛濛  
歸騎漸遙  
征塵不斷  
何處認郎蹤  
雙鴛池沼水溶溶  
南北小橋通  
梯橫畫閣黃昏後  
又還是新

月簾櫳沈恨細思不如桃李還解嫁春風

前調

蘇軾

今年春淺臘侵年冰雪破春妍東風有信無人見露微  
意柳際花邊寒夜縱長孤衾易暖鐘鼓漸清圓朝來  
初日半含山樓閣淡疎煙遊人便作尋芳計小桃杏應  
已爭先酒病少情疎慵自放惟愛日高眠

前調

秦觀

年時今夜見師師雙頰酒紅滋疎簾半捲微燈外露華

上煙裊涼颺簪髻亂拋人不起彈淚唱新詞佳期  
誰料久參差愁緒暗縈絲想應妙舞清歌罷又還對秋  
色嗟咨惟有畫樓當時明月兩處照相思

前調

宗室令  
郊送酒

晁補之

王孫眉宇鳳凰雛天與世情踈揚州座上瓊花底佩錦  
囊曾憶奚奴金盞醉揮滿身花影紅袖競來扶十年  
一夢訪林居離袂重跼踟應憐肺病臨邛客寄洞庭春  
色雙壺天氣未佳梅花正好曾醉燕堂無

前調

生日答  
十二叔

晁補之

碧山無意解銀魚花底且攜壺華顛又喜熊羆旦笑騏  
驎老反為駒文史漸拋功名更嬾隨處見真如高情  
敢並漢庭疏長揖去田廬囊無上賜金堪散也未妨山  
獵溪漁廉頗縱強莫隨年少白馬向黃榆

前調

暮春  
送別

趙長卿

階前春草亂抽芽塵暗綠窓紗釵盟鏡約知何限最斷  
腸湓浦琵琶南渚送船西城折柳遺恨在天涯夜來

魂夢到儂家一笑臉如霞鶯啼燕恨西牕下問何事潘  
鬢先華鐘動五更魂歸千里殘角怨梅花

前調

杏花

趙長卿

柳鶯啼曉夢初驚香霧入簾清  
臙脂淡注宮妝雅似文君  
猶帶春醒芳心婉婉媚容  
綽約桃李總消聲相如  
春思正營營無奈惜花情  
曲闌小檻幽深處與殷勤遮  
護娉婷姚黃魏紫十分顏色  
終不似輕盈

前調

程垓

傷心時候一凭闌  
何況別離難  
東風只解催人去  
也不道鶯老花殘  
青牋未約紅綃  
忍淚無計鎖征鞍  
寶釵瑤鈿一時閒  
此恨苦天慳  
如今直恁拋人去  
也不念人瘦衣寬  
歸來忍見重樓淡月  
依舊五更寒

前調

袁去華

東風吹恨著眉心  
金約瘦難任  
西窓翦燭渾如夢  
最愁處南陌分襟  
香歇繡囊塵生羅韞  
憔悴到如今  
小花幽院夜沉沉  
涼月轉槐陰  
拂牆樹動開朱戶  
又贏得愁



與更深青翼不來征鴻難倩流怨入瑤琴

前調

陸游

尊前凝竚漫淒迷猶恨負幽期從來不慣傷春淚為伊  
後滴滿羅衣那堪更是吹簫池館青子綠陰時回廊  
簾影盡參差偏共睡相宜朝雲夢斷知何處倩雙燕說  
與相思從今判了十分憔悴圖要箇人知

前調

韓洄

翻空雪浪送飛花春曉媚霜華風迴點點迷人處峭寒

輕詩思殊佳雙燕未來斷鴻何在微雨又天涯 綺窓  
明暗是誰家雕檻馥蘭芽畫檐簾捲黃昏後試傾杯笑  
語喧譁聚散人生吾儕老矣醉墨任橫斜

前調

夏夜宿小蓬萊對月不寐

吳子孝

玻璃牕影薄於冰月色滿空庭夜闌別館無人到吹繡  
幙楊柳風清幽興難窮徘徊竹徑草上露華凝 閒揮  
玉塵練衫輕坐久覺涼生只疑瀟灑非塵境洞門外雪  
墜盈盈搗藥宮前游仙枕上寒逼夢難成

鳳樓春

雙調七  
十八字

鳳樓春

歐陽炯

鳳髻綠雲叢深掩房櫳錦書通夢中相見覺來慵勻面  
淚臉珠融因想玉郎何處去對淑景誰同小樓中春  
思無窮倚闌凝望暗牽愁緒柳花飛趁東風斜日照珠  
簾羅幌香冷粉屏空海棠零落鶯語殘紅

陽關引

一名古陽關與陽關曲  
同義雙調七十八字

陽關引

寇準

塞草煙光闊渭水波聲咽春朝雨霽輕塵斂征鞍發指  
青青楊柳又是輕攀折動黯然知有後會甚時節更  
盡一杯酒歌一闕歎人生裏難歡聚易離別且莫辭沉  
醉聽取陽關徹念故人千里自此共明月

前調

寄八弟

晁補之

草草蛩吟噎暗柳螢飛滅空庭雨過西風緊飄黃葉卷

書帷寂靜對此傷離別重感歎中秋數日又圓月沙  
背檣竿上淮水闊有飛鳧客詞珠玉氣冰雪且莫教皓  
月照影驚華髮問幾時清尊夜景共佳節

### 金人捧露盤

金一作銅一名上西平一名西平  
曲一名上南平雙調七十八字

### 金人捧露盤

會稽秋風  
亭觀雪

辛棄疾

九衢中杯逐馬帶隨車問誰解愛惜瓊華何如竹外靜  
聽窸窣蛸行沙自憐是海山頭種玉人家 紛如鬪嬌

如舞纔整整又斜斜要圖畫還我漁蓑凍吟應笑羔兒  
無分謾煎茶起來極目向瀾茫數盡歸鴉

前調

送杜叔高

辛棄疾

恨如新新恨了又重新看天上多少浮雲江南好景落  
花時節又逢君夜來風雨春歸似欲留人尊如海人  
如玉詩如錦筆如神更能幾字盡殷勤江天日暮何時  
重與細論文綠楊陰裏聽陽關門掩黃昏

甘州令

亦是六州歌頭之  
一雙調七十八字

甘州令

柳永

凍雲深淑氣淺寒欺綠野輕雪伴早梅飄謝豔陽天正  
明媚却成瀟灑玉人歌畫樓酒對此早驟增高價賣  
花巷陌放燈臺榭好時代怎生輕捨賴和風蕩霽靄廓  
清良夜玉塵鋪桂莖滿素光裏更堪遊冶

紅窓燈影

雙調七十八字王錫爵  
一詞和友人自度曲也

紅牕燈影

王錫爵

高倚危樓垂垂四面皆空翠離天近矣除了凡心未歎  
濁質少清緣奇異一段斜陽團簇箇閒愁送至試問  
斯愁端倪還向何邊起黃村綠墅總是傷人意笑遺恨  
特登樓一味相對長吁看又是寒雲擁蔽

御街行

又一體雙調七十  
八字一名孤鴈兒

御街行

范仲淹



紛紛墜葉飄香砌  
夜寂靜寒聲碎  
真珠簾捲玉樓空  
天澹銀河垂地  
年年今夜月華如練  
長是人千里  
愁腸已斷  
無由醉酒未到  
先成淚  
殘燈明滅  
枕頭敲諳盡孤眠滋味  
都來此事  
眉間心上  
無計相迴避

前調

楊无咎

平生厭見花時節  
惟只愛梅花發  
破寒迎臘吐幽姿  
占斷一番清絕  
照溪印月帶煙和雨  
傍竹仍藏雪  
松煤染出宜孤潔  
最嫌把鉛華拭  
暗香銷盡欲飄零  
須得笛

聲鳴咽這些風味自家領取莫與傍人說

前調

辛棄疾

闌干四面山無數供望眼朝與暮好風吹雨過山來吹  
盡一簾煩暑紗幮如霧簟紋如水別有生涼處冰肌  
不受鉛華污更旒旒真香聚臨風一曲最妖嬈唱得行  
雲且住藕花都放木樨開後待與乘鸞去

前調

程垓


住家不覺窮冬好向客裏方知道故園梅子正開時記

得清尊頻倒高燒紅燭暖熏羅幌一任花枝惱如今  
客裏傷懷抱忍雙鬢隨花老小牕獨自對黃昏只有月  
華飛到假饒真箇雁書頻寄何似歸來早

前調

宋媛  
李清照

簾牀紙帳朝眠起說不盡無佳思沉香煙斷玉鑪寒伴  
我情懷如水笛聲三弄梅心驚破多少春情意小風  
疎雨瀟瀟地又催下千行淚吹簫人去玉樓空腸斷與  
誰同倚一枝折得人間天上沒箇人堪寄



御選歷代詩餘卷四十九

# 欽定四庫全書

集部

御選歷代詩餘卷

五十一

詳校官中書

臣

潘有為

侍讀臣孫球覆勘

總校官進士

臣

朱鈐

校對官主事

臣

陳文樞

謄錄監生

臣

方汝觀

欽定四庫全書

御選歷代詩餘卷五十目錄

起七十九字  
至八十二字

紅林擒近

周邦彥 二首

袁去華

方千里 二首

楊澤民 二首

陳允平 二首

金人捧露盤

又一體

張元幹

程垓

高觀國

三首

劉基

周用

山亭柳

杜安世

望雲涯引

李景元

憶黃梅

王觀

過澗歇

柳永

晁補之

鬪百花



晁補之

前調又一體

晁補之

安公子

柳永

最高樓

劉基

款殘紅

楊慎

瑶階草

程垓

最高樓

又一體

辛棄疾

三首

程垓

劉克莊

蔣捷

元好問

司馬昂父

御街行

又一體

高觀國

二首

鬪百花

又一體

柳永

皂羅特髻

蘇軾

金人捧露盤

又一體

賀鑄

倒垂柳

楊无咎

柳初新

柳永

新荷葉

趙抃

侯寘

辛棄疾

四首

趙彥端

二首

前調

又一體

趙長卿

趙彥端

鄭斗煥

早梅芳

又一體

周邦彥

二首

陳允平

二首

吳洪

拂霓裳

晏殊

二首

柳腰輕

柳永

千秋歲引

王安石

吳子孝

徐有貞

夏允彝

洞仙歌

吳文英

八六子

王沂孫

最高樓

又一體

毛滂

夢玉人引

呂渭老

南州春色

汪莘



御選歷代詩餘卷五十目錄

欽定四庫全書

選歷代詩餘卷五十

起七十九字至八十二字

司經局洗馬掌局事兼翰林院修撰加二級臣王奕清奉

日校刊

紅林擒近

紅林擒果名即紅奈也唐教坊有此曲因以名詞雙調七十九字或無近字

紅林擒近

雪二首

周邦彥

高柳春纔軟凍枝寒更香暮雪照清峭玉塵散林塘那

堪飄風遞冷故遣度幙穿牕似欲料理新妝呵手弄絲簧  
冷落詞賦客蕭索水雲鄉援毫授簡風流猶憶東梁望虛檐徐轉迴廊未埽夜長莫惜空酒觴

前調

周邦彥

風雪驚初霽水鄉增暮寒樹杪墮毛羽檐牙挂琅玕才  
喜門堆巷積可惜迤邐銷殘漸看低竹翩翻清池漲微  
瀾步履晴正好宴席晚方歡梅花耐冷亭亭來入冰  
盤對前山橫素愁雲變色放杯同覓高處看

前調

袁去華

森木蟬初噪淡煙梅半黃睡起傍檐隙牆梢挂斜陽魚  
躍浮萍破處碎影顛倒垂楊晚庭誰與追涼清風散荷  
香望極霞散綺坐待月侵廊調冰薦飲全勝河朔飛  
觴漸參橫斗轉懷人未寢別來偏覺今夜長

前調

雪次周美  
成韻二首

方千里

花幙高燒燭獸煙深炷香寒色上樓閣春威徧池塘多  
情天孫織罷故與玉女穿牕素臉淺約宮妝風韻勝笙

黃 遊冶尋舊侶尊酒老吾鄉清歌度曲何妨塵落雕  
梁任瑤階平尺珠簾人報賸揅酌酊飛羽觴

前調

方千里

曉起山光慘晚來花意寒映月衣纖縞因風珮琅玕三  
弄江梅聽徹幾點岸柳飄殘宛然舞曲初翻簾影捲波  
瀾 把酒同喚醉促膝小留歡清狂痛飲能消多少杯  
盤況人生如寄相逢年老歲華休作容易看

前調

雪次周美成韻二首

楊澤民

輕有鵝毛體白無龍腦香瓊笋綴飛桷冰壺鑑方塘渾  
如瑤臺閬苑更無茅舍蓬牕畫閣自有梅妝貪耍罷彈  
簧  
鼓舞沽酒市蓑笠釣魚鄉遐觀自樂吾心何必濠  
梁待喬木都凍千山盡老更煩玉指勸羽觴

前調

楊澤民

梅信初回暖風稜猶壯寒禾稼響圭壁簾旌隱琅玕門  
前羣山尚滿牕外數片餘殘凍底潛有魚翻東風漸生  
瀾  
杖策扶半醉燕寢有餘歡兒童自捧皚皚調蜜盈

盤兆豐穰和氣來呈美瑞莫同輕薄飛絮看

前調

雪次周美成韻二首

陳允平

飛絮迷芳意落梅銷暗香皓鶴唳空碧白鷗避寒塘妨  
他踏青鬪草便放曉日東牕先自嬾弄晨妝誰耐聽笙  
簧望帝尋酒市看釣認漁鄉控持紫燕芹泥未上雕  
梁想梁園謝館尋花較晚但陪玉樹頻舉觴

前調

陳允平

三萬六千頃玉壺天地寒庾嶺封的皪淇園折琅玕漠

漠梨花爛漫紛紛柳絮飛殘直疑潢潦驚翻斜風泝狂  
瀾對此頻勝賞一醉飽清歡呼童翦韭和冰先薦春  
盤怕東風吹散留尊待月倚闌莫惜今夜看

金人捧露盤

又一體雙調  
七十九字

金人捧露盤

張元幹

臥扁舟聞寒雨數佳期又還是輕誤仙姿小樓夢冷覺  
未應恨我歸遲鬢雲髮處沈檀斜露泣花枝 名與利



空紫繫添憔悴謾孤恹得見了說與教知偎香倚暖夜  
鑪圍定酒溫時任他飛雪灑江天莫下層梯

前調

惜春

程垓

愛春歸憂春去為春忙旋點檢雨障雲妨遮紅護綠翠  
幃羅幙任高張海棠明月杏花天更惜濃芳喚鶯吟  
招蝶拍迎柳舞倩桃妝盡呼起萬籟笙簧一觴一咏儘  
教陶寫繡心腸笑他人世漫嬉遊擁翠偎香

前調

水仙花

高觀國

夢湘雲吟湘月弔湘靈有誰見羅韞塵生凌波步弱背  
人羞整六銖輕娉娉裊裊暈嬌黃玉色輕明 香心靜  
波心冷琴心怨客心驚怕珮解却返瑤京杯擎清露醉  
春蘭友與梅兄蒼煙萬頃斷腸是雪冷江清

前調

梅花

高觀國

念瑤姬翻瑤佩下瑤池冷香夢吹上南枝羅浮夢杳憶  
曾清曉見仙姿天寒翠袖可憐是倚竹依依 溪痕淺  
雪痕凍月痕淡粉痕微江樓怨一笛休吹芳音待寄玉

堂煙驛兩棲遲新愁萬斛為春瘦却怕春知

前調

高觀國

楚宮閒金成屋玉為闌斷雲夢容易驚殘驪歌幾疊至  
今愁思怯陽關清音恨阻抱哀箏知為誰彈年華晚  
月華冷霜華重鬢華斑也須念閒損雕鞍斜緘小字錦  
江三十六鱗寒此情天闊正梅信笛裏關山

前調

劉基

水如藍山如黛草如絲正去年雙燕來時衡門晝掩日

長惟有睡相宜午風吹破北牕夢檐影參差 李花開  
梅花謝榴花放杏花稀枉教人兩鬢雙垂凭闌竚立空  
將愁眼盼斜暉斷雲迢遞趁征鴈直到天涯

前調

五月十二  
日喜雨

周用

仰皇天驅雨伯駕飛廉記農師舊有靈占自來大旱不  
過五月十之三山河大地從滂沛西北東南 挽長河  
千里潤嘗舊井十分甘奈微涓自喜沾沾雲雷大造天  
功那許世人貪鳳凰池上恩波闊新綠遙添

山亭柳

雙調七  
十九字

山亭柳

杜安世

曉來風雨萬花飄落歎韶光虛過却芳草萋萋映樓臺  
淡煙漠漠紛紛絮飛院宇燕子過朱閣玉容淡妝添  
寂寞檀郎辜願太情薄數歸期絕信約暗添春宵恨平  
康恣迷歡樂時時悶飲綠醕甚轉轉思量著

望雲涯引

雙調七  
十九字

望雲涯引

李景元

秋容江上。岸花老。蘋洲白露濕。蕙葭浦。嶼漸增寒色。閒  
漁唱晚。鷺雁驚飛處。映遠磧。數點輕帆送天際。歸客  
鳳臺人散。漫迴首沈消息。素鯉無憑樓上暮。雲凝碧時  
向西風下。認遠笛。宋玉悲懷未信金尊消得。

憶黃梅

雙調七  
十九字

憶黃梅

王觀

枝上葉兒未展已有墜紅千片春意怎生防怎不怨被  
我安排矮牙牀斗帳和嬌豔移在花叢裏面請君看  
惹清香偎媚暖愛香愛暖金杯滿問春怎管大家撩便  
做東風總吹教零亂猶兀自輸我鴛鴦一半

過澗歌

雙調八  
十字

過澗歌

柳永

淮楚曠望極千里火雲燒空盡日西郊無雨厭行旅數  
幅輕帆漸落棹蒹葭浦避畏景兩兩舟人夜深語  
此際爭可便恁奔名競利去九衢塵裏衣冠冒炎暑回  
首江鄉月觀風亭水邊石上幸有散髮披襟處

前調

晁補之

歸去奈故人尚作青眼相期未許明時歸去放懷處買  
得東皋數畝靜愛園林趣任過客剝啄相呼晝扃戶  
堪笑兒童事業華顛向誰語草堂人悄圓荷過微雨都



付邯鄲一枕清風好夢初覺砌下槐影方亭午

鬪百花

唐時鬪花以奇者為勝調名取此一名夏州與鬪百草無涉雙調八十字

鬪百花

晁補之

小小盈盈珠翠憶得睂長眼細曾共映花低語已解傷  
春情意重向溪堂臨風看舞梁州依舊照人秋水轉更  
添姿媚與問階上簸錢時節記微笑但把纖腰向人  
嬌倚不見還休誰教見了厭厭還是向來情味

前調

又一體

晁補之

斜日東風深院繡幙低迷歸燕瀟灑小屏嬌面髣髴燈  
前初見與選筵中銀杯半折姚黃插向鳳凰釵畔微笑  
遮紈扇教展香裯看罷霓裳促徧紅飈翠翻驚鴻乍  
拂秋岸柳困花慵盈盈自整羅巾須勸倒金盞

安公子

雙調八

十字

安公子

柳永

長川波瀲灩楚鄉淮岸迢遞一霎煙汀雨過芳草青如  
染驅馬攜書劍當此好天好景自覺多愁多病行役心  
情厭望處曠野沈沈暮雲黯黯行侵夜色又是急漿  
投村店認去程將近舟子相呼遙指漁燈一點

最高樓

雙調八  
十字

最高樓

劉基

今宵月還照別離愁愁上最高樓九霄無路青冥闊玉

京風露冷於秋寶刀裁不斷水東流 誰知道黃梁炊  
未熟早過了洞天三十六塵土事幾時休廣寒桂樹清  
香好圓光恰滿又成鉤笑階前萱草浪語忘憂

款殘紅

雙調八十字此楊慎自名調乃八韻五言古詩合  
生查子二調為一調換頭用宋李之儀謝池春慢  
語以其獨立  
一調存之

款殘紅

楊慎

花徑款殘紅風沼紫新皺有意惜餘春無計消長晝香

醪瀉玉窪瑞腦噴金獸誰與共溫存寂寞黃昏後  
頻移帶眼寬只恁懨懨瘦不見又思量見了還依舊為問  
頻相見何似長相守天生竝頭蓮好結同心藕

瑤階草

雙調八  
十字

瑤階草

程垓

空山子規叫月破黃昏冷簾幙風輕綠暗紅又盡自從  
別後粉銷香膩一春成病那堪晝閒日永恨難整起

來無語綠萍破處池光淨悶理殘妝照花獨自憐瘦影  
睡來又怕飲來越醉醒來却悶看誰似我孤另

最高樓

又一體雙調  
八十一字

最高樓

辛棄疾

長安道投老倦遊歸七十古來稀藕花雨濕前湖夜桂  
枝風澹小山時怎消除須殢酒更吟詩也莫向竹邊  
辜負雪也莫向柳邊辜負月閒過了總成癡種花事業

無人問惜花情緒只天知笑山中雲出早鳥歸遲

前調

用前韻  
賦牡丹

辛棄疾

西園買誰載萬金歸多病勝遊稀風斜畫燭天香夜涼  
生翠蓋酒酣時待重尋居士譜謫仙詩看黃底御袍

元自貴看紅底狀元新得意如斗大笑花癡漢妃翠被  
嬌無奈吳姬粉陣恨誰知但紛紛蜂蝶亂笑春遲

前調

賦梅

辛棄疾

花知否花一似何郎又似沈東陽瘦稜稜地天然白冷

清清地許多香笑東君還又向北枝忙 著一陣霎時  
間底雪更一箇缺些兒底月山下路水邊牆風流怕有  
人知處影兒守定竹旁廂且饒他桃李趁少年場

前調

程垓

舊心事說著兩眉羞記得凭肩遊湘裙羅襪桃花岸薄  
衫輕扇杏花樓幾番行幾番醉幾番留也誰料春風  
吹已斷又誰料朝雲飛亦散天易老恨難酬蜂兒不解  
知人苦燕兒不解說人愁舊情懷消不盡幾時休



前調

再題周  
登樂府

劉克莊

周郎後直數到清真君莫是前身八音相應諧韶樂一  
聲未了落梁塵笑而今輕郢客重巴人 只少箇綠珠  
橫玉笛更少箇雪兒彈錦瑟欺賀晏壓黃秦可憐樵唱  
并菱曲不逢御手與龍巾且酣眠篷底月甕間春

前調

蔣捷

新春景明媚在何時宜早不宜遲軟塵巷陌青油憶重  
簾深院畫羅衣要些兒晴日照暖風吹 一片片雪兒

休要下一點點雨兒休要灑纔恁地越愆期悠悠不趁  
梅花到匆匆枉帶柳花飛倩黃鶯將我話報春歸

前調

元好問

商於路山遠客來稀雞犬靜柴扉東家歡飲薑芽脆西  
家留宿芋魁肥覺重來猿與鶴總忘機問華屋高貴  
誰不戀問美食大官誰不羨風浪裏竟安歸雲山既不  
求吾是林泉又不責吾非任年年藜藿飯芰荷衣

前調

暮春

司馬昂父

花信緊二十四番愁風雨五更頭侵苔苔蘚宜羅襪逗  
衣梅潤試香篝綠牕閒人夢覺鳥聲幽 按秦箏學弄  
相思調寫幽情恨殺知音少向何處說風流一絲楊柳  
千絲恨三分春色二分休落花中流水裏兩悠悠

御街行

又一體雙調  
八十一字

御街行 賦簾

高觀國

香波半窳深深院正日上花陰淺青絲不動玉鈎閒看

翠額輕籠葱蒨鶯聲似隔篆煙微度愛橫影參差滿  
那回低挂朱闌畔念悶損無人捲窺春偷倚不勝情仿  
佛見如花嬌面纖柔緩揭瞥然飛去不似春風燕

前調 賦輅

高觀國

藤筠巧織花紋細稱穩步如流水踏青陌上雨初晴嫌  
怕濕文鴛雙履要人送上逢花須住纔過處香風起  
裙兒挂在簾兒裏更不把牕兒閉紅紅白白簇花枝恰  
稱得尋春芳意歸來時晚紗籠引道扶下人微醉

鬪百花

又一體雙調  
八十一字

鬪百花

柳永

煦色韶光明媚輕靄低籠芳樹池塘淺蘸煙蕪簾幙閒  
垂飛絮春困厭厭拋擲鬪草工夫冷落踏春心緒終日  
扃朱戶遠恨緜緜淑景遲遲難度年少傳粉依前醉  
眠何處深院無人黃昏乍拆鞦韆空鑲滿庭花雨

皂羅特髻

雙調八十一字一名採菱拾  
翠以蘇軾詞起句得名也

皂羅特髻

蘇軾

采菱拾翠算似此佳名阿誰消得采菱拾翠稱使君知  
客千金買采菱拾翠更羅裙滿把真珠結采菱拾翠正  
髻鬟初合真箇采菱拾翠但深憐輕拍一雙手采菱  
拾翠繡衾下抱著俱香滑采菱拾翠待到京尋覓

金人捧露盤

又一體雙調  
八十一字

金人捧露盤

賀鑄

控滄江排青嶂燕臺涼駐綵仗樂未渠央巖花磴蔓妒  
千門珠翠倚新妝舞筵歌悄恨風流不管餘香繁華  
夢驚俄頃佳麗地指蒼茫寄一笑何與興亡量船載酒  
賴使君相對兩交牀緩調清管更為儂三弄斜陽

倒垂柳

雙調八  
十一字

倒垂柳

九日

楊无咎

曉來煙露重為重陽增勝致記一年好處無似此天氣  
東籬白衣至南陌芳筵啟風流曾未遠登臨都在眼底  
人生如寄謾把茱萸看子細擊節聽高歌痛飲莫辭  
醉烏帽任教顛倒風裏墜黃花明日縱好無情味

柳初新

雙調八  
十一字

柳初新

柳永

東郊向曉星杓亞報帝里春來也柳擡煙眼花勻露臉



漸覺綠嬌紅，  
妖妝點層臺。  
芳榭運神功，  
丹青無價別。  
有堯堦試罷，  
新郎君成行。  
如畫杏園風，  
細桃花浪暖。  
競喜羽遷鱗，  
化徧九陌。  
相將遊冶，  
驟香塵寶鞍驕馬。

新荷葉

雙調八十二字  
一名折新荷引

新荷葉

趙抃

雨過迴廊圓荷嫩，  
綠新抽越女輕。  
盈畫橈穩泛蘭舟，  
芳容豔粉紅香透。  
脈脈嬌羞菱歌隱隱，  
漸遙依約回眸。

堤上郎心波間妝影遲留不覺歸時淡天碧襯蟾鉤風  
蟬噪晚餘霞際幾點沙鷗漁笛不道有人獨倚危樓

前調

侯寘

柳幄飛絲風池煙泛新萍燕壘泥香玉麟堂外春深晴  
雲麗日花濃處蜂蝶紛紛償春一醉管絃聲裏歡聲  
況是清時錦衣重到臺城故國江山向人依舊多情趁  
閒行樂休辜負冶葉繁英彤庭歸覲時難駐前旌

前調

辛棄疾

人已歸來杜鵑欲勸誰歸綠樹如雲等閒付與鶯飛兔  
葵燕麥問劉郎幾度沾衣翠屏幽夢覺來水遶山圍  
有酒重攜小園隨意芳菲往日繁華而今物是人非春  
風半面記當年初識崔徽南雲鴈少錦書無箇因依

前調

用前韻

辛棄疾

春色如愁行雲帶雨纔歸春意長閒遊絲盡日低飛閒  
愁幾許更曉風特地吹衣小牕人靜暮聲似解重圍  
光景難攜任他鷓鴣芳菲細數前愆不應詩酒皆非知

音絃斷笑淵明空撫餘徽停杯對影待邀明月相依

前調

題悠然閣

辛棄疾

種豆南山零落一頃為其歲晚淵明也吟草盛苗稀風  
流剗地向尊前采菊題詩悠然忽見此山正遶東籬  
千載襟期高情想像當時小閣橫空朝來翠撲人衣是  
中真趣問騁懷遊目誰知無心出岫白雲一片孤飛

前調

辛棄疾

曲水流觴賞心樂事良辰蘭蕙光風轉頭天氣還新明

昨皓齒看江頭有女如雲折花歸去綺羅陌上芳塵  
能幾多春試聽啼鳥殷勤對景興懷向來憂樂紛紛且  
題醉墨似蘭亭別叙時人後之覽者又將有感斯文

前調

次辛稼軒韻

趙彥端

欲暑還涼如春有意重歸春若歸來任他鶯老花飛輕  
雷澹雨似晚風欺得單衣檐聲驚醉起來新綠成圖  
回首分攜光風冉冉菲菲曾幾何時故山疑夢還非鳴  
琴再撫將清恨都入金徽永懷橋下繫船溪柳依依

前調

次前韻

趙彥端

雨細梅黃去年雙燕還歸多少繁紅盡隨蝶舞蜂飛陰  
濃綠暗正麥秋猶衣羅衣香凝沈水雅宜簾幙重圍  
繡扇仍攜花枝塵染芳菲遙想當時故交往往人非天  
涯再見悅情話景仰清徽可人懷抱晚期蓮社相依

前調

又一體

趙長卿

冷徹蓬壺翠幢鼎鼎生香十頃琉璃望中無限清涼遮  
風掩日高低襯密護紅妝陰陰湖裏羨他雙浴鴛鴦

猛憶西湖當年一夢難忘折得曾將蓋雨歸思如狂水  
雲千里不堪更回首思量而今把酒為伊沈醉何妨

前調

秀州作

趙彥端

玉井冰壺人間有此清秋笑語雍容令從庭戶初修迎  
風待月香凝處四捲簾鉤月波奇觀未饒當日南樓  
聞說三吳江湖從古風流況有雙轡舊譜黃閣清油金  
甌屢啟應難解久為人留天池波濫可憐蘋滿汀洲

前調

荷葉

鄭斗煥

乳鴨池塘晴波漾綠粼粼宿藕根香夏來生意還新鈿  
花貼翠蛺蝶錢小相間萍星一番雨過一番暗展圓青  
魚戲龜游看來猶未勝情因憶年時垂釣曾釣輕盈玉  
人何處闌情是半捲芳心簾風一掉鴛鴦催起歌聲

早梅芳

又一體雙調  
八十二字

早梅芳

周邦彥

花竹深房櫳好夜闌無人到隔牕寒雨向壁孤燈弄餘



照淚多羅袖重意密鶯聲小正魂驚夢怯門外已知曉  
去難留話未了早促登長道風披宿霧露洗初陽射  
林表亂愁迷遠覽苦語縈懷抱謾回頭更堪歸路杳

前調

周邦彥

繚牆深叢竹繞宴席臨清沼漸呈纖履故隱烘簾自嬉  
笑粉香妝暈薄帶緊腰圍小看鴻驚鳳翥滿座歎輕妙  
酒醒時會散了回首城南道河陰高轉露脚斜飛夜  
將曉異鄉淹歲月醉眼迷登眺路迢迢恨滿千里草

前調

次周美  
成韻

陳允平

柳初妍花漸好可恨行期到落梅香雪淡月朦朧影漸  
照風簾銀燭暗露幙金泥小縱離歌緩唱殘角又霜曉  
瑣牕前秦吉了促上長安道揚鞭西去幾點稀星尚  
雲表去程疑是夢宿酒昏情抱鳳樓空瓊簫聲漸杳

前調

次周美  
成韻

陳允平

鳳釵橫鸞帶繞獨步鴛鴦沼闌干斜倚自撲精神對花  
笑貼衣瓊佩冷襯韞金蓮小捲香茵縹緲舞袖稱纖妙

夢初成歡未了明日青門道離雲別雨脈脈無情畫  
堂曉柳邊驕馬去翠閣空凝眺漸春風綠愁江上草

前調

吳洪

柳將眠桃欲笑又是清明到玉河冰泮無數金魚弄池  
藻聯車油壁軟竝馬絲鞭裊喜鳳城麗景游覽趁春曉  
望瀛洲紛翠葆花滿瓊華島玉螭西去金碧觚稜聳  
雲表散衙常過午下直須歸早更相期提壺同籍草

拂霓裳

雙調八十二字霓裳羽衣為唐時道調法曲  
之最大者宋舞曲名亦有拂霓裳詞調本此

拂霓裳

晏殊

喜秋成千門萬戶樂昇平金風細玉池波浪殺文生宿  
露霑羅幙微涼入畫屏張綺宴傍熏鑪蕙炷和新聲  
神仙雅會會此日象蓬瀛管絃清旋翻紅袖學飛瓊光  
陰無暫住歡醉有閒情祝辰星願百年為壽獻瑤觥

前調

晏殊

笑秋天晚荷花綴露珠圓風日好數行新鴈貼寒煙銀

簧調脆管瓊柱撥清絃捧觥船一聲聲齊唱太平年  
人生百歲離別易會逢難無事日剩呼賓友啟芳筵星  
霜催綠鬢風露損朱顏惜清歡又何妨沈醉玉尊前

柳腰輕

雙調八  
十二字

柳腰輕

柳永

英英妙舞腰肢軟章臺柳昭陽燕錦衣冠蓋綺堂筵宴  
是處千金爭選顧香砌絲筵初調倚輕風佩環微顫

乍入霓裳促徧逞盈盈漸催檀板慢垂霞袖急趨蓮步  
進退奇容千變笑何止傾國傾城暫回眸萬人腸斷

千秋歲引

雙調八  
十二字

千秋歲引

王安石

別館寒砧孤城畫角一派秋聲入寥廓東歸燕從海上  
去南來鴈向沙頭落楚臺風庾樓月宛如昨無奈被  
些名利縛無奈被他情擔閣可惜風流總閒却當初謾

留華表語而今誤我秦樓約夢闌時酒醒後思量著

前調

吳子孝

朱夏初臨薰風漸扇永日畫堂消香篆閒身長狎水中  
鷗芳辰恰覩梁間燕舉玉卮歌金縷春無限六十年  
華人正健紺鬢紅顏猶未變蘭玉盈庭閭里羨裊裊紅  
生檻上雲垂垂柳散風中線太平時清和節長生宴

前調

徐有貞

風攪柳絲雨柔花纈蚤過了清明時節新來燕子語何

多老去鶯花飛未歇  
秋千院蹴鞠場人蹤絕  
踏青拾翠都休說是誰馬走章臺雪  
是誰簫弄秦樓月  
從前已是無情緒可奈而今更離別  
一回頭人千里腸百結

前調

夏允彝

澤國微茫海濱寥廓萬堞孤城逼天角  
雲外龍車碧樹懸霜前鴈字當牕落  
苧城花秦山月都蕭索  
刺史風流攜琴鶴  
刺史風流倚軒閣  
醺酒新亭幾忘却  
三泖沙明遠郡樓  
九峰嵐翠扶城郭  
銅壺響曉更催宛如昨



洞仙歌

雙調八十二字此調體製不同皆以字數分八各卷此則第一體也

洞仙歌

賦黃木香  
贈辛稼軒

吳文英

花中慣識壓架瓏璁雪不見湘英間琅葉恨春風將了  
染額人歸留得箇裊裊垂香帶月鵝兒真似酒我愛  
幽芳還比荼蘼又嬌絕自種古松根待黃龍亂飛上蒼  
髯五鬣更老仙添與筆端春敢喚起桃花問誰優劣

八六子

雙調八  
十二字

八六子

王沂孫

埽芳林幾番風雨匆匆老盡春禽漸薄潤侵衣不斷嫩  
涼隨扇初生晚牕自吟 沉沉幽徑芳尋暗靄苔香簾  
淨蕭疎竹影庭深漫忘却寶釵蟲折綃屏鸞破當時暗  
水和雲泛酒空山留月聽琴料如今門前數重翠陰  
最高樓

又一體雙調  
八十二字

最高樓

毛滂

微雨過深院  
芰荷中香冉冉  
繡重重  
玉人共倚闌干角  
月華猶在小池東  
入人懷  
吹鬢影可憐風  
分散去輕如雲與雪  
剩下了許多風  
與月侵枕簟  
冷簾櫳  
剛能小睡還驚覺  
略成輕醉  
早惺忪  
仗行雲將此恨到睂峰

夢玉人引

雙調八  
十二字

夢玉人引

呂渭老

上危梯望畫閣迴畫簾垂曲水飄香小園鶯喚春歸舞  
袖弓彎正滿城煙草淒迷結伴踏青趁蝴蝶雙飛賞  
心歡計從別後無意到西池自檢羅囊要尋紅葉留詩  
嬾約無憑據鶯花都不知怕人問強開懷細酌醪醑

南州春色

雙調八  
十二字

南州春色

汪莘

清溪曲一株梅無人修采獨立古牆隈莫恨東風吹不

到著意挽春回一任天寒地凍南枝香動花傍一陽開  
更待明年首夏酸心結子天自栽培金鼎調羹仁心  
猶在還種處無限根荄管取南州春色多自此中來

御選歷代詩餘卷五十